

(الشیطان)

جلست حزیناً مهموماً وسألت نفسي: وماذا بعد؟ لقد مللتُ من بني البشر، ومن كل شيء حولي أريد أن أستريح.. أن أنعم بلحظة هدوء. أن أخلو إلى نفسي وأسترجع شريط حياتي.. ولكن من يحل محلي؟ لمن أترك وظيفتي؟ هل أتركها لأحد أبنائي؟ أخاف أن يطمع فيها فأجد نفسي بلا وظيفة! الحل هو أن أختار أحداً من بني البشر! وأثناء سيرتي رأيت شحاذاً عليه أسمالٌ باليةٌ يسأل الناس بأسلوب أفنعني أن أمد يدي في جيبي وأخرج بعض الجنيئات وأعطيا له.

دعا لي قائلاً: ربنا يطول في عمرك يا بيه.

من الناحية دي اظمن.. وأكملت: أنا عايزك في شغلانة.

— تحت أمرك يا بيه أنا خدامك.

— عايزك تبقى أنا.

— العفوا يا بيه، أنا شحات مسكين وأنت بيه كبير المقام.. لازم أنت بتهزر

هي العين تعلق على الحاجب؟

— أنا بتكلم بجد أنا عايزك تبقى مكاني كام يوم كده.. أصل أنا عايز

استريح شويه وشغلانتي بسيطة وسهلة.

— وشغلانة ايه دي؟

— الزن في الودان.

— إنت بتشتغل ايه حلاق؟

— لا أنا بشتغل شیطان.

- شيطان! أعوذ... وضعت يدي على فمه.. إنت عايزني امشي ولا ايه.. دا أنا هاغرقك فلوس.
- بس دي أول مرة أشوف حضرتك.. بس أنا كنت متخيلك بقرون وديل.
- إيه يا عم انت كده متخيل معزة مش شيطان.. بص شوف يا معلم أنا هعطيك الفلوس اللي انت عايزها وأي حاجة تتمناها.
- مفيش قول بعد قولك أنا مو افق.. بس ازاي هاشتغل وأنا ما عنديش قدرتك ولا قوتك؟
- ما تخفش أنا هدربك.
- في برج العرب ولا في الجونة؟
- أمسكت نفسي من أن أحرقه حيًّا وقلت في نفسي:
- هو حظي يوقعني في شحات من موجة كوميدي؟
- أنا هاعطيك لمسة شيطانية تخليك جن مشيطان.
- الشحاذ بعدما ارتدى ثوب الأبالسة:
- إيه رأيك أنفع؟
- مش بطل بصّ بقه أنا تعبت وهسيبك دلوقتي!
- ما تشيلش هم بدون مقاطعة هتلاقي كل حاجة تمام.. هتيحي من الأجازة هتلاقي الناس مقطعة بعض والدم للركب.
- أنا عايزك تشتغل بضمير ولا تؤول شراليوم إلى الغدا!
- إنت دلوقتي معطلني ومش عارف اشوف شغلي.
- طيب... طيب أنا ماشي.

- لا إله إلا الله.. تروح وتيجي بالسلامة.

الشیطان یصرخ:

- أنا حاسس إن نهايتي هتكون على إيدك. يختفي ويتركه وحيداً!

ثلاثة أشهر كاملة وأنا خارج نطاق الخدمة.. ولكنني أسمع عن أخبار ثورات وانقلابات ومذابح ومجاعات.. هذا الشحاذ يلعب دوره باقتدار لا بد له من مكافأة تليق بهذا العمل الظلامي!

أعود لأجده يجلس أمام شاشة تليفزيونية عملاقة، ويبيكي من مشهد سينمائي قديم لفاتن حمامة ويقذف بعض حبات الفشار في فمه.. أحس وجودي.. التفت إليّ:

- أهلا وسهلا وحشتني. وقام باحتضاني بشوق وأكمل:

- إنت جايب لي معاك إيه؟

- هو أنا جاي من الكويت؟ إنت بتعمل إيه؟

- بشوف فيلم الملل بعيد عنك يقتل.

- والشغل اللي اتفقنا عليه؟

- إنت شايف الناس مولّعة في بعض من غير حاجة.. أنت فاكّر أني

عملت حاجة.. دا أنا من ساعة ما سبتني وأنا قاعد اتفرج على روتانا

كلاسيك والناس اتوحشت.

- يعني إيه الناس مش محتاجة لي؟!

- بصراحة أنت ما لكش لازمة الناس تفوقوا عليك في الشر.. أفكارك

قديمة لا تناسب العصر.

- يعني أنا دلوقتي عاطل بلا وظيفة؟ وأنا اللي كنت فاكر إنني بذكائي
وشيطنتي اللي بعمل كل الشرور اللي في الدنيا. أجلس بجانب الشحاذ
وأتناول بعض حبات الفيشارو أبكى عندما تسقط فاتن حمامة ميتة
بمرض خطير.. أسأله هي كانت عيانة؟ يجيب من وسط دموعه: أيوه!

أبكي بصوت مسموع!